

Večeras na festivalu u Salzburgu dobrotvorni koncert za BiH

Festival u Salzburgu večeras će biti domaćin dobrotvornog koncerta za Bosnu i Hercegovinu u izvedbi orkestra ciriške opere, La Scintilla, i jednog od vodećih svjetskih dirigenata Nikolausa Harnoncourta.

Članovi orkestra i dirigent u tu svrhu će se odreći svojih naknada. Cjelokupni prihod od koncerta namijenjen je za tri integrativna projekta: multietničke vrtiće u Sarajevu, multikonfesionalnu gimnaziju u Banjoj Luci i multikulturalnu muzičku školu u Srebrenici.

Nazvavši ovaj koncert „izuzetnom gestom“, visoki predstavnik Valentin Inzko zahvalio je Nikolausu Harnoncourtu i članovima orkestra na njihovoj velikodušnosti i ovom „izvanrednom daru“.

„Bosna i Hercegovina i njeni divni ljudi zaslužuju bolju budućnost. Međunarodna zajednica, ali i mi kao pojedinci, kao Evropljani, trebamo pomoći kako bi ta lijepa zemlja zacijelila ožiljke iz nedavne prošlosti“, rekao je Inzko.

Večerašnji koncert dio je ciklusa Haydnovih oratorija i smatra se jednom od najinteresantnijih izvedbi u okviru festivala u Salzburgu. La Scintilla će izvesti Haydnovo rano djelo „Il ritorno di Tobia“, koje je, u doba svoga nastanka, bilo jedno od najviše izvođenih djela klasične muzike u Beču, ali se u posljednje vrijeme vrlo rijetko izvodi.

Inicijativa za današnji događaj potekla je od orkestra La Scintilla, koji je odlučio ukazati Harnoncourtu čast da sam izabere mjesto i vrijeme koncerta. „To je zaista jedinstven dar. Nikada u životu nisam doživio da orkestar svira besplatno u čast dirigenta,“ izjavio je novinarima vidno ganuti Harnoncourt. Orkestar je također proglasio Harnoncourta

počasnim članom u znak zahvalnosti za dugogodišnju suradnju.

Današnji koncert će također pomoći i dobrotvorne organizacije iz Bosne i Hercegovine – Caritas, Merhamet, Dobrotvor i La Benevolenciju.